

**Kalaallit Nunaanni politimesteri nunap ilaani aalajangersimasuni immikkut akuersissuteqartarsinnaanera periarfissaqartillugu nunami maani inunnik angallassitutini biilini assakaasut quaannaveeqqutillit atoqqusaajunnaarnissaat siunertaralugu naalagaaffeqatigiinni oqartussaaffinnut saaffiginneqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.**

(Ineqarnermut Attaveqaqatigiinnermullu Naalakkersuisoq)

### **Akissuteqaat**

(Ineqarnermut Attaveqaqatigiinnermullu Naalakkersuisoq)

### **Siullermeerneqarnera**

Naalakkersuisuniit Inatsisartuni ilaasortaq Steen Lynge, Demokraatit, aalajangiiffigisassatut siunnersuummik saqqummiussaqaarneranut qutsavigaarput.

Assakaasut quaannaveeqqutillit atorneqarnerinut angallannermi isumannaallisaanerup siuarsarneqarnissaa siunertaavoq. Taamaattumik inerteqquteqalernissaq angallannermi isumannaallisaanerumut aammalu assersuutigalugu aqquernit nungullartarnerinut silaannarmillu mingutsitsinerumut naleqqiunneqartussaavoq.

Ilisimatusarneq, assakaasut quannaveeqqutillit ajoqusiisarnerisa iluaqutaasunit annertunerunerinik tikkuussisoq siunnersuuteqartup innersuussutigaa. Maani nunatsinni pissusiviusut misissorneqarnissaat tunngavigineqartariaqarpoq, isumannaallisaaneq silap pissusii malillugit naliliiffigineqartarmata.

Sooq inerteqquteqarneq biilinit inunnik angallassitutitut taamaallaat atuutissanersoq ersarinngilaq. Qamutit assakaasullit oqimaatsut biilinit inunnik angallassitutitut aqqusinernik nungullartitsinerujussuusarput. Lastbiili biilimit inunnik angallassissummit 10.000-eriaammik aqqusinernik nungullartitsisarpoq.

Assakaasunik aalajangersimasunik ataatsinik inerteqquteqalernissamik aalajangiinnginnermi kingunerisassat qinigassallu allat misissoqqissaarneqartariaqarput. Taamatut misissuinissamut piginnaasaqarfiit naalagaaffeqatigiinnermi oqartussaasunit pigineqarput.

Taamaattumik aalajangiiffigisassatut siunnersuummut allannguutissatut siunnersuut una Naalakkersuisunit saqqummiunneqarpoq:

”Angallannermi isumannaallisaanerumut sunniuteqanngitsumik aqqusinernik nungullartitsisarnermik silaannarmillu mingutsitsinermik annikillititsinissamut periarfissanik misissuinissaq siunertaralugu naalagaaffeqatigiinni oqartussaaffinnut saaffiginneqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.”

Taamatut oqaaseqarlunga siunnersuut Inatsisartuni suliarisassanngorlugu saqqummiuppara.